

So auch/ jr liebsten Jünger mein/ Werd jr betrübt vnd traw-
rig sein/ Doch solt jr wider sehen mich/ Vnd ewer Hertz soll frewen
sich.

Vnd diese Frewd nichts nemen soll/ Von euch/ denn werdt ihr
alles wol/ Verstehn/ vnd an demselben tag/ Werd jr an mich thun
keine Frag.

Herr Jesu wend in Fröligkeit/ Der Kirchen Leid vnd Trau-
rigkeit/ Vnd steh jr bey in aller Noth/ Ohn dich kein Trost noch
Hülff sie hat.

Am vierden Sonntag nach Ostern/ Euangelium/ Johan. 16.

Nach der Melodien vnd Composition/ Herr Jesu Christ
war Mensch vnd Gott/ Fol. 43.

Ich geh zu dem/ der mich gesand/ Doch fragt mich vnter euch
niemand/ Vnd weil jr hört/ das ich hingeh/ Thuts euch in
ewren Herzen weh.

Warlich zum besten euchs geschicht/ Sonst kömpt zu euch der
Tröster nicht/ Welchen ich zu euch senden werd/ Wenn ich hingeh
von dieser Erd.

Straffen wird er die böse Welt/ Welche mein Wort nicht
gleubt noch helt/ Vmbß Gricht vnd vmb die Gerechtigkeit/ Vmb
die Sünd vnd ire Bosheit.

Das ist der Welt Sünd eigentlich/ Das sie nicht gleuben wil
an mich/ Veracht auch die Gerechtigkeit/ Die jr durch mich ist zu-
bereit.